

# TORITENY - Alahady faharoa FIAVIAN'NY TOMPO - TAONA D



**"Amboary ny lalan'ny Tompo, ahitsio ny halehany; ny lohasaha rehetra hototofana, ny tendrombohitra sy ny havoana rehetra haetry" Lk 3,5**

Ry Kristianina Havana, tena tafiditra ao anatin'ny fiomanana amin'ny fiaviana na Avent isika. Araka ny volagnintsika matetika dia manokana ity fankalazana ny Avent, fankalazana ny fiavian'ny Tompo ity satria tena mampiditra antsika amin'ny fiatrehana ny Sinaody izay azo lazaina fomba lehibe handraisantsika ny Tompo eo anivon'ny fiainantsika ka hanaovantsika « DEPART VAOVAO », fiaingana vaovao hoy isika. Ary izay no hahatongavan'ny Tompo eto anivon'ny fiainantsika. Ny Noely no fanombohan'ny misterin'ny famonjena antsika. Vanimpotoan-dehibe ho antsika izany izao Avent izao. Tena « Temps fort » tokoa amin'ny fankalazana ny Sinaody : « Eglisy Olo, miara-dia, miombona, velomin'ny Batemy, mandray antanana ka zary Tabernakla velona ».

Vakiteny I : Bar. 5,1-9 Tononkira : Sal. 125,1-2ab. 2de- 3. 4-5. 6.  
Vakiteny II : Fil. 1, 4-6. 8-11  
Evanjely : Lk. 3,1-6

Ireo vakiteny rahateo dia tena mampiditra antsika amin'izay voalazantsika teo ka manomana antsika amin'izany fiavian'ny Tompo. Ary indrindra amin'izao Alahady faharoa ny Avent izao dia miresaka manokana momba ny « lalana ». Ho avy tokoa ny Tompo ary mitondra hafaliana ary hamonjy antsika izy ka mila « amboarina ny lalany ». Matokia isika eo am- pamakivakiana ny Avent ity fa « miara-dalana amintsika ny Tompo ». Torak'izany koa tsy irery isika amin'izao Sinaody izao fa miaraka amintsika ny Tompo. Marina misy fotoana tokoa

mitondra hafaliana ary hamonjy antsika izy ka mila « amboarina ny lalany ». Matokia isika eo am- pamakivakiana ny Avent ity fa « miara-dalana amintsika ny Tompo ». Torak'izany koa tsy irery isika amin'izao Sinaody izao fa miaraka amintsika ny Tompo. Marina misy fotoana tokoa

izay tsy hahitantsika ny lalan-kombana ary misy fotoana aza toa tsy misy intsony ny mpaminany izay irahin'Andriamanitra hanoro ny lalana. Na koa maro ny milaza ho mpaminany ka very « fanahy mbola velona maro » very repères. Anisan'ny mpaminany mamilaka ireny tambanjotra sôsialy ireny araky ny voalazan'ny taratasin'ny Eveka. Mila mitandrina isika.

### **Inona tokoa moa ny atao hoe mpaminany ?**

Ny mpaminany dia tsy hoe mahita ny hoavy, anisan'ny asany izany fa tsy izay no tena fototra. Mpaminany izy ka mahita ny hoavy satria nampahalalan'Andriamanitra ny sitrapony ary ny fahalalana ny sitrapon'Andriamanitra izay hotoriny amin'ireo vahoaka no mahatonga azy manambara ny hoavy fa tsy izay no asan'ny mpaminany sy ny maha-mpaminany ny mpaminany. Ny Mpaminany dia manambara ny sitrak'Andriamanitra mba ahafahan'ny vahoaka manitsy ny diany. Ny fivelomana ny sitrapon'Andriamanitra manko no mitondra amin'ny tena fiainana hahitana ny hasambarana. Eo anatrehan'ny fiainana manahirana sy hahitana fifangoan-javatra ilaina no hahafantarana ny sitrak'Andriamanitra nefo indrisy misy izay fotoana tsy nisian'izany mpaminany izany teo amin'ny vahoakan'Andriamanitra, ary indrisy na amin'izao andro iainantsika izao, ka izay ny mahatonga ny Md Papa Paoly VI nanoratra hoe : tsy ny mpitory teny loatra no tadiavin'izao tontolo izao, ny vaninandro iainantsika izao fa ny vavolombelona. Matoa izy mihaino ny mpitoriteny dia satria mivelona izay toriny ireny mpitoriteny ireny, vavolombelona ny mpaminany. Mitady mpaminany tokoa izao vanim-potoana iainantsika izao hanomana antsika, hanokatra ny fontsika mba handray ny Tompo, mba ho afaka handray ilay hoavy, ilay mpamonjy izay hitondra hafaliana, hitondra aim-baovao, hitondra fiadanana hanavao ny fiainantsika, mpaminany hanomana antsika amin'izany. Ary dia izany izao Alahady faharoa izao hahitantsika ny endriky ny mpaminany nanomana ny fahatongavan'ny Tompo dia i Joany Batista. Henontsika ao amin'ny Evanjely ny endrik'i Joany Batista ary dia hahitantsika ny endriky ny mpaminany. Isika Kristianina izay mitafy ny endrik'i Kristy, izay nandray ny Fanahy Masina, dia isika izao àry no antsoina mpaminany eo amin'ny fiainantsika andavanandro ary hitarika ny olona tahaka ny nataon'i Joany Batista izay niantso ny olona hibebaka hanamboatra ny lalan'ny Tompo. Ary izany tokoa, hamboarintsika ny lalan'ny Tompo hahafahantsika handray azy. Io no tanjon'izao Sinaody izao, hanomana ny lalan'ny Tompo hiditra eo amintsika ka hahitantsika ny fivelarana ny mahaolona manontolo sy mahaolon-drehetra. Hahatonga antsika ho OLON-DEHIBE AMPINOANA.

### **Ary inona moa ny hoe hanamboatra ny lalan'ny Tompo?**

Henoy tsara ny hafatr'i Joany Batista izay mitanisa ny tenin'Izaia mpaminany : Ahitsio ny alehany, izay tokoa, aoka hahitsy ny fiainantsika. Mpaminany araka ny nolazaintsika teo araka

ny famaritan'i Md Papa Paoly VI fa ny fiainany no manambara an'izay toriny. Io no mahatonga antsika mamerimberina mandrakariva hoe: hahay hampitraotro ny finoana sy ny fiainana andavanandro. Izay no mpaminany, izay no nataon'i Joany Batista, ary izay no irintsika ry Kristianina havana ho tanteraka amintsika tsirairay avy amin'izao fiomanantsika amin'ny fahatongavan'ny Tompo izao mba ho mpaminany isika tsirairay avy. Izay no dikan'ny hoe Olon-dehibe am-pinoana vokatry ny sinaody. Mpaminany isika raha mahitsy ny fiainantsika sy ny lèlana arahintsika rehetraretra. Atsaharo ny fitapitaka, ampy zay ny risoriso, aoka ny vandivandy, aoka ho lavitra antsika ireny. Aoka HAHITSY MAZAVA NY FIAINANTSINKA. Ny lohasaha rehetra ho totofana.

### **Inona moa ny lohasaha?**

Ny lohasaha dia tsy inona fa ireny fiainantsika andavandro ireny izay manjaka matetika ny avonavona, ny fialonana, ny fitiavan-tena. Ireny no lavaka lalina dia lalina mikiky ny fiainantsika. Manalavitra antsika tsirairay avy ny lavaka, amin'izay tsy afaka mifanatona satria misy lavaka, noho ny fitiavan-tena, fialonana, avonavona. Zary misy elanelana isika eo amin'ny fifandraisantsika. Ka ireny no lohasaha tsy maintsy totofantsika amin'izao fiomanantsika amin'ny fahatongavan'ny Tompo izao, amin'izao fiatrehantsika ny Sinaody izao ka hahatonga antsika ho Eglisy Olo, miara-dalana, velomin'ny Batemy ka miombona mandray an-tanana ka zary Tabernakla velona. Tabernakla velona, Kristy MPIARA-BELONA amin'ny olona ka hanalavitra ireny fialonana izay manapotika ny fifandraisana ka tsy hahafahantsika mifanatona ireny. Ny tendrombohitra sy ny havoana rehetra haetry, ny avonavona haetry, banana fanetren-tena isika satria tsy misy ny fomba handresentsika an'ireny avonavona sy fialonana ireny raha tsy misy ny fanetren-tena. Ireny ny tendrombohitra izay tsy ahatakaran'ny manodidina ny fiainantsika ka aoka ary banana fanetren-tena isika tahaka ny voalazan'i Md Paoly ao amin'ny vakiteny faharoa izay mampianatra antsika mba banana ny fahadiovana ary banana fiainana tsy manan-tsiny, banana fanetren-tena isika. Izay ny hanadio ny fontsika ka amin'izay tsy ho hisy intsony ireny tendrombohitra avonavona, tendrombohitra fialonana ireny fa banana fanetren-tena isika. Ary hoy ny ao amin'ny Evanjely mitanisa an'izay voalazan'Izaia : ny meloka rehetra, ny lèlana mikitoantoana dia hohamarinina ka hahita ny famonjen'Andriamanitra isika rehefa marina ny fiainantsika, marina tsara, izany hoe miezaka isika hanadio ny fontsika ao anatin'ny fanetren-tena ary hanatona ny sakramentan'ny konfesy. Izao tokoa ny vanim-potoana tsara ka aoka isika mba hanatona ny sakramentan'ny konfesy mba hialantsika amin'ireny zavatra ireny ka hahitsy ny fiainantsika dia ho tanteraka izay voalazan'i Barôka mpaminany ao amin'ny vakiteny voalohany: haneho ny famirapiratan'Andriamanitra amin'ny tany rehetra ka hanjaka tokoa amin'izay ny fiadanana ary ireo fahoriany sy fijaliana rehetra dia ho lavitra, ny hery setra tsy ho hisy intsony fa ny fifankatiavana sy ny fihavanana no hanjaka eto anivontsika. Izay no

irintsika ry Kristianina Havana.

Ry Jesoa Tompo ô, mbola maro ny vato misakana anay vokatrin'ny avonavona, vokatrin'ny fialonana sy ny fitiavan-tena eo aminay, koa enga anie hahay hanararaotra an'izao fiomanana akaiky dia akaiky ny fahatongavano amin'ny alalan'ny fankalazana ny Avent izao izahay mba hanao ezaka hihavao tokoa ka hiala amin'ireny fomba ratsy mahazatra anay ireny izay manapotika ny fifandraisana na amin'ny zava-boaary ka mahatonga ireny motro manambara heritsetra ireny. Tsy miala amin'izany koa ny fifandraisana eo anivon'ny fiaraha-monina potika noho ireny fomba mamoritra ireny. Hahay hanararaotra izao Avent izao-izahay, hahay hanararaotra izao Sinaody izao ka hihavao. Ampio izahay mba ho mpaminaninao tokoa tahaka an'i Joany Batista hanambara anao amin'ny alalan'ny fiainanay, hahay hampitraotro ny finoana amin'ny fiainana andavanandro, handresy ny avonavona, ny fitiavan-tena, sy ny fialonana ka hampanjaka ny fifamelan-keloka sy famindram-po lalana mitondra amin'ny fiadanana marina. Ianao ilay fiadanana eto anivonay, Ianao tokoa no Emanoela eto anivonay. Masina Maria ampianaro izahay hanana fanetren-tena marina. Md Josefa Lehilahy marina ianao, ampianaro izahay hivelona ny fahamarinana, hampanjaka ny rariny sy ny hitsiny hiaro mandrakariva ny madinika. Amen

Mompera Arseveka Mgr Benjamin Ramaroson